

Expediente IET: P-21-461
Proxecto: Parque eólico Piago e a súa infraestrutura eléctrica de evacuación
Concello: Cervo, Xove, Viveiro e O Valadouro (Lugo)
Promotor: Naturgy Renovables, S.L.U.

INFORME DE IMPACTO E INTEGRACIÓN PAISAXÍSTICA

De acordo co artigo 37.1 da Lei 21/2013, do 9 de decembro, de avaliación ambiental, e co artigo 11.3 da Lei 7/2008, do 7 de xullo, de protección da paisaxe de Galicia, con data do 23/11/2021 a Dirección Xeral de Planificación Enerxética e Recursos Naturais achega ao Instituto de Estudos do Territorio (IET) a documentación relativa ao proxecto de Parque eólico Piago e a súa infraestrutura eléctrica de evacuación.

1. Antecedentes:

Con data do 15/07/2021 o IET emitiu un informe de impacto e integración paisaxística, de acordo co previsto no artigo 11.3 da Lei 7/2008. Nese informe indicábase que o estudo de impacto de integración paisaxística (EIIP) elaborado non se axustaba ao disposto na Lei 7/2008, do 7 de xullo, de protección da paisaxe de Galicia, e ao Regulamento da Lei 7/2008. Así mesmo facíanse unha serie de consideracións sobre distintas medidas que debería adoptar o proxecto para minimizar os impactos e acadar unha mellor integración paisaxística.

Posteriormente, o 16/09/2021 o IET emite un segundo informe de impacto e integración paisaxística no que se reiteran as medidas non contempladas na emenda remitida pola empresa promotora, en concreto a necesidade de minimizar as afeccións aos afloramentos rochosos e as relacionadas co centro de seccionamento.

2. Marco legal:

Consonte co artigo 15 da Lei 1/2021, do 8 de xaneiro, de ordenación do territorio de Galicia, e co artigo 28 do Decreto 244/2011, do 29 de decembro (modificado polo Decreto 42/2019, do 28 de marzo), o Instituto de Estudos do Territorio (IET) é o órgano competente para emitir este informe en materia de paisaxe, de acordo co que para tal efecto establecen os artigos 32 e 33 do Regulamento para o desenvolvemento da Lei 7/2008, do 7 de xullo, de protección da paisaxe de Galicia (Decreto 96/2020, do 29 de maio).

En desenvolvemento da Lei 7/2008 aprobáronse o Catálogo das paisaxes de Galicia (Decreto 119/2016, do 28 de xullo) e as Directrices de paisaxe de Galicia (Decreto 238/2020, do 29 de decembro).

De acordo co artigo 11.1 da Lei 7/2008, todos os proxectos que deban someterse a declaración de impacto ambiental deberán incorporar no estudo de impacto ambiental un estudo de impacto e integración paisaxística (EIIP), como documento específico no que se avaliarán os efectos e impactos que o proxecto poida provocar na paisaxe e as medidas de integración paisaxística propostas. O contido do EIIP debe axustarse ao disposto no artigo 11.2 da Lei 7/2008 e nos artigos 26 e seguintes do Regulamento da Lei 7/2008.



3. Informe:

Na contestación recibida ao segundo informe do IET, a empresa promotora achega un novo EIIP que incorpora a xustificación do cumprimento das directrices DX 17 e DX 26, así como as relacionadas co centro de seccionamento. No referente ás afeccións aos afloramentos rochosos leva a cabo un estudio dos mesmos nas posicións L4-02, L4-07 e L4-08, acompañándoo con fotografías do ámbito e propoñendo unha modificación no trazado da vía de acceso ás plataformas de montaxe para minimizar as posibles afeccións. Tamén fai un estudo máis pormenorizado da incidencia sobre os miradoiros, achegando ademais unha infografía dende o miradoiro máis próximo, Alto do Lombo Gordo.

En base á nova documentación achegada constátase a baixa calidade dos afloramentos rochosos das posicións L4-02 e L4-07, ao tempo que se confirma a singularidade e elevada afección aos afloramentos da posición L4-08, sen posibilidade de ser mitigada mediante deseños alternativos. No relacionado cos miradoiros queda de manifesto a importante intrusión visual que se produce no máis próximo á infraestrutura (Alto do Lombo Gordo), non podendo considerarse como atenuante a presenza doutros aeroxeradores noutras direccións.

Polo tanto, en base á nova documentación achegada, conclúese que este proxecto producirá uns impactos significativos sobre afloramentos rochosos que outorgan carácter á paisaxe e sobre o miradoiro do Alto do Lombo Gordo. A medida para minimizar este impacto pasará pola eliminación ou cambio de posición do aeroxerador L4-08, que é o situado a menor distancia do miradoiro e que presenta unha maior incidencia sobre afloramentos rochosos; ademais reduciríase tamén a lonxitude dos camiños de nova construción necesarios para o seu servizo.

Lémbrese que, de acordo co artigo 30.3 do Regulamento da Lei 7/2008, as medidas correctoras determinadas no EIIP deberán quedar oportunamente recollidas no proxecto.

José Luís Álvarez Vicente
Xefe do Servizo de Planificación da Paisaxe

José Antonio Serantes Barbeito
Director do Departamento Técnico de Estudos

Visto e conforme, Enrique Luís de Salvador Sánchez
Director do Instituto de Estudos do Territorio

(Na data da sinatura electrónica)

